
ՍԻՐԻԱՀԱՅԵՐԻ ՍՈՑԻԱԼ-ԺՈՂՈՎՐԴԱԳՐԱԿԱՆ ՆԵՐՈՒԺԸ ՀՀ-ՈՒՄ

ՀԱԿՈՒՅԱՆ Գ. Լ.

Բազմաթիվ վիճակագրական տվյալներ վկայում են այն մասին, որ Հայաստանն ունի ժողովրդագրական խնդիրներ. այդ իրավիճակը հատկապես մտահոգիչ են դարձնում ցածր ծնելիությունը, ծերացումն ու միգրացիան: Ժողովրդագրական վարքագծի դրական մոտիվացիան, առաջին հերթին, պետք է խրախուսվի պետության կողմից¹: Եվ կարծես ժամանակին առիթ է ստեղծվել ՀՀ-ի համար՝ իրապես վերլուծելու իրավիճակը և լուրջ քայլեր ձեռնարկելու երկիր ժամանած սիրիահայերի ներուժն ըստ արժանվույն գնահատելու ուղղությամբ՝ չանտեսելով նրանց Հայաստան բերող բոլոր շարժառիթները և Հայաստանից մեկնելու բոլոր պատճառները: Մարդկային ի նչ ներուժի մասին է խոսքը, սեռատարիքային ի նչ կազմով, մասնագիտական ու կրթական ի նչ բազայով է ներկայանում սիրիահայ համայնքը Հայաստանում, ի նչ կազմ ունեն սիրիահայ ընտանիքները. այս հարցերի ամփոփ վերլուծությունն է տրվում սույն հոդվածում:

Սիրիահայ համայնքն առավել հզոր, կայացած, բազմաշերտ ու կայուն հայ համայնքներից մեկն է աշխարհում: Հայերը Սիրիայում (Ասորիքում) բնակություն են հաստատել հնագույն ժամանակներից: Տիգրան Բ Մեծի օրոք Ասորիքի զգալի մասը որոշակի ժամակահատված (մ.թ.ա. 80-60-ական թթ.) ընդգրկվել է հայկական տերության կազմում: Հայկական աղբյուրները հիշատակում են, որ այդ ժամանակ հայերի մեծ գաղթ է տեղի ունեցել դեպի Սիրիայի հյուսիսային շրջաններ²: Մ. Գասպարյանն իր աշխատությունում նշում է, որ հայերի գաղթը արաբական երկրներ պայմանավորված էր ոչ միայն Հայաստանի արտաքին կապերով, այլև Բյուզանդական կայսրության և արաբական խալիֆայթում հայերի գրաված դիրքով³:

Սիրիահայ համայնքը մեծապես համալրվել է 1915 թ. Հայոց ցեղասպանությամբ՝ մազապուրծ գաղթականներով: Սկզբնական շրջանում Սիրիայում հայ գաղթականներն ապրել են ծանրագույն պայմաններում՝ հիմնականում վրանային ճամբարներում: Բնական է, որ սկզբնական փուլում հայերը մտադրություն չէին ունենա վերջնականորեն հաստատվել Սիրիայում, որտեղ նրանք հայտնվել էին միանգամայն նոր, ինչ-որ իմաստով խորթ մի միջավայրում, որն ուներ տարբերակիչ

¹ Միջազգային փորձագիտության մեջ ընդունված են դրական մոտիվացիայի երեք տեսակներ՝ նյութական, սոցիալական և հոգեբանական:

² Աբրահամյան Ա. Գ., Համառոտ ուրվագիծ հայ գաղթավայրերի պատմության, Կ. Ս., 1964, էջ 428:

³ Գասպարյան Մ. Ս., Սիյուռքահայ գաղթօջախներն այսօր, Ե., 1962, էջ 166:

մի շարք գործոններ՝ էթնիկ, կրոնական, լեզվական, մշակութային և այլն: Մակայն հետազայում նրանք հաշտվեցին Սիրիայում հաստատվելու իրականության հետ, իսկ նշված գործոնները նպաստեցին հայ տարագիրների էթնիկ և մշակութային ինքնության պահպանմանը⁴:

Հայերը ժամանակի ընթացքում սկսեցին ինքնակազմակերպվել որպես համայնք, ցուցաբերեցին քաղաքական կազմակերպվածություն՝ ինտեգրվելով նաև Սիրիայի հասարակական կյանքում: Աստիճանաբար տարագիրների զանգվածը վերաճեց կազմակերպված ու կենսունակ համայնքի, որը ձգտում էր ամեն կերպ պահպանել ազգային ինքնությունը: Այս գործընթացում զգալի ներդրում ունեցավ Հայ առաքելական եկեղեցին, որը, իր բուն գործառնություններին զուգահեռ, բացառիկ դեր խաղաց հայերի հավաքագրման, նրանց օգնություն տրամադրելու գործում: Եկեղեցու հովանու ներքո էր Աղքատախնամ հանձնախումբը, որը համակարգում էր տարագիրներին տրամադրվող օժանդակությունը: Հայերի շրջանում ակտիվ գործունեություն էին ծավալում նաև հայկական հայրենակցական, մշակութային ու բարեգործական միություններն ու կազմակերպությունները, ինչպես նաև ազգային քաղաքական կուսակցությունները (Սոցիալ-դեմոկրատ հնչակյան, Ռամկավար ազատական և Հայ հեղափոխական դաշնակցություն), որոնք համայն-քային խնդիրների լուծման նպատակով համագործակցում էին եկեղեցու հետ⁵:

Սիրիայում հայերի մեծ մասը ապրում էր Հալեպում, համեմատաբար փոքր զանգված կենտրոնացած էր նաև Կամիշլիում, Դամասկոսում, Արաբ-Բունարում, Թարապլուսում, Տրապեսայում, Հոմսում, Տեր-Ջորում, Քեսաբում և մյուս վայրերում: Մինչ պատերազմը Սիրիայում հայ համայնքը պաշտոնապես հաշվվում էր 100.000 մարդ: Համայնքի թվակազմի վերաբերյալ շրջանառվում էին նաև ավելի նվազ տվյալներ՝ 50.000-80.000 մարդ⁶:

Ըստ մեր անցկացրած էթնոսոցիոլոգիական հետազոտության արդյունքների՝ այսօր Հայաստանում էլ սիրիահայերի մեծ մասը Հալեպի հայ համայնքի ներկայացուցիչներ են՝ մոտ 85%, և միայն 5.5%-ն են Դամասկոսի հայերը: 2014 թվականի ընթացքում Հայաստանում են ապրել նաև Քեսաբից, Կամիշլիից, Ռաքքայից, Տեր-Ջորից եկած հայերը: ՀՀ-ում գտնվող հալեպահայերի 4.5%-ը

⁴Триницис Х. Т. Поселение армянских беженцев в Сирии и Ливане в 1915-1939 гг., Е., 1982, т. 2, с. 10.

⁵Дятлов В., Мелконян Э. Очерки социокультурной типологии. Армянская диаспора, Е., 2009, с. 112.

⁶Փաշայան Ա., Հարությունյան Լ., Սիրիայի հայ համայնքը. արդի հիմնախնդիրներ, Ե., 2011, էջ 13:

⁷Էթնոսոցիոլոգիական հետազոտությունն իրականացվել է քանակական և որակական մեթոդաբանությամբ՝ 184 քանակական հարցում և 36 խորին հարցազրույցներ սիրիահայ ընտանիքների շրջանում՝ Երևանում և մարզերում՝ 2014 թվականի ընթացքում: Առաջին մեթոդի դեպքում սեռա-տարիքային կազմի ներկայացուցչությունն ապահովելու համար ընտանիքից պատահականորեն ընտրվել է մեկ հոգի՝ ըստ ծննդյան սկզբունքի, (հարցման օրվան նախորդող ամենամոտ օրը ծնված), իսկ խորին հարցազրույցներն անցկացվել են ըստ սեռի, տարիքի և զբաղվածության չափանիշների:

Հայաստան է տեղափոխվել երրորդ երկրից՝ Լիբանանից (Բեյրութ), Քուվեյթից, որտեղ որոշ ժամանակ ապրելուց հետո նրանք որոշել են տեղափոխվել հայրենիք:

Հալեպի հայ բնակչությունը մասնակցել է քաղաքի տնտեսական կյանքի բոլոր ոլորտներին: Այստեղ կան մեծ թվով բանվորներ, որոնք զբաղված են գլխավորապես տեքստիլ արդյունաբերության մեջ, արհեստավորներ՝ ոսկերիչ-ներ, դերձակներ, կոշակակարներ և այլն: Զգալի է առևտրականների թիվը: Որոշ հայեր հասել են տնտեսական բարձր դիրքի և ունեն իրենց խոշոր խանութները, գործարանները և այլ արդյունաբերական ձեռնարկություններ⁸:

Սիրիայի, մասնավորապես Հալեպի հայ համայնքը դարձել է նաև արևմտահայերենի և արևմտահայ մշակույթի պահպանման ու զարգացման ամենակարևոր ու բացառիկ օջախներից մեկը ողջ Սփյուռքում: Սիրիայում հայերն իրավունք են ստացել կազմակերպելու իրենց ազգային կյանքը, ազատորեն դավանելու սեփական կրոնը, սովորելու մայրենի լեզուն, զարգացնելու հայկական մշակույթը:

Այսպիսով, Սիրիան այն երկիրն է, որը ցեղասպանությունից հետո ընդունել է մեծ թվով հայերի, և որտեղ հայերը բնակություն են հաստատել ինչպես իրենց տանը, իսկ այսօր հայրենիքը կանգնած է նրանց ընդունելու խնդրի առջև: 2012 թվականից ի վեր Սիրիայում տեղի ունեցող պատերազմի պատճառով շատ հայեր են տեղափոխվել ՀՀ⁹: Ստեղծված իրավիճակում հայրենիքն ընտրելու դրդապատճառները տարբեր են, սակայն արդի իրականությունում Հայաստանը հայրենիքի գաղափարից կարծես վերածվել է ժամանակավոր ապաստանի գաղափարի: Բազմաթիվ վերլուծություններ և փորձագիտական գնահատական-ներ հանգեցնում են այն մտքին, որ եթե բավարար պայմաններ չստեղծվեն Հայաստանում սիրիահայերի բնակության և լիարժեք ինտեգրման համար, ապա ժամանոց հայրենադարձները կլքեն վաղուց երազած հայրենիքը: Սակայն հայրենադարձության եզրույթի մասին խոսելիս նաև պետք է հաշվի առնել, որ այն երկկողմանի գործընթաց է, որում կարևորվում են «հայրենադարձվողների» մտադրություններն ու ցանկությունները:

Էթնոսոցիոլոգիական հետազոտության տվյալների վերլուծությամբ բացահայտվել են սիրիահայերի՝ Հայաստանն ընտրելու հետևյալ դրդապատճառները.

1. հայրենիքի գաղափարը, հայ լինելու հանգամանքը՝ **38%**.
2. ուրիշ ելք չկար, մյուս երկրները մուտքի թույլտվություն չէին տալիս՝ **18.5%**.
3. սոցիալական ցանցի առկայությունը՝ **7.8%** (բարեկամներ/ հարազատներ/ ծանոթներ ունենք).

⁸ Գասպարյան Ս. Տ., նշվ. աշխ., էջ 170:

⁹ Ըստ ՀՀ Սփյուռքի նախարարության տրամադրած տվյալների, որոնք փոխանցվել են ՀՀ ԳԱԱ հնագիտության և ազգագրության ինստիտուտի 2014 թ. փետրվարի 13-ի թիվ 2470-34 գրությամբ, 2014 փետրվարի դրությամբ Հայաստանում բնակվում է շուրջ 11.000 սիրիահայ, մոտ 2.800 ընտանիք (տվյալները փոփոխական են և մոտավոր):

4. ընտանիքի անդամները նախօրոք տեղափոխվել էին կամ վաղուց ապրում են ՀՀ-ում՝ 7.8%.
5. Հայաստանում ապահով, անվտանգ է՝ 7%.
6. լեզվին տիրապետում ենք՝ 6%.
7. շրջագայության նպատակով կատարած այցից հետո չենք վերադարձել Սիրիա՝ 6%.
8. աշխատանքի հեռանկար ՀՀ-ում՝ 2%.
9. այլ պատճառներ (եկել ենք ՀՀ՝ երրորդ երկիր գնալու նպատակով, մենք չենք ընտրել և այլն)՝ 6%:

Տվյալներից նկատելի է, որ Հայաստան տեղափոխվելու որոշում կայացնելու գործընթացում սիրիահայերի համար հայրենիքի գաղափարը առաջնային է մյուս պատճառների նկատմամբ: Եզրակացություններ անելիս չի կարելի անտեսել հարցի զգացմունքային կողմը: Այստեղ տեղին կլինի միայն հավելել, որ հարցմանը մասնակցած սիրիահայերի մեծ մասը՝ 70.7%-ը, Հայաստանն է համարում իր հայրենիքը, 22.8%-ը՝ Սիրիան: (Հարցին դժվարացել են պատասխանել 6.5% սիրիա-հայեր):

Դրդապատճառների մեջ հաջորդ մեծ պատասխանը (18.5%) ունի հարկադրական երանգ, երբ այլ ելքերի բացակայության պայմաններում սիրիահայը ստիպված լքում է պատերազմի մեջ գտնվող երկիրը և գալիս Հայաստան: Մի կողմից՝ պատահական, մյուս կողմից՝ հարկադրական հարթության մեջ պետք է դիտարկել այն պատասխանը (6%), ըստ որի 2012 թվականի ամռանը շրջագայության նպատակով Հայաստանում գտնվող սիրիահայերը պատերազմի պատճառով չեն կարողացել վերադառնալ Սիրիա:

Պատասխանների մեծ մասը, համենայն դեպս, վկայում է ստեղծված իրավիճակը նրանց կողմից ռացիոնալ գնահատելու մասին՝ սոցիալական ցանցի առկայություն, հայերենին տիրապետում, աշխատանքի հեռանկար, Հայաստանի՝ ապահով, անվտանգ լինելու փաստ, Հայաստանը՝ որպես տարանցիկ երկիր և այլն:

Հարցի՝ սեռային բնութագրիչի հետ համադրումից պարզվում է, որ հայրենիքի գաղափարը ավելի կարևորվել է հարցմանը մասնակցած սիրիահայ կանանց մոտ, քան տղամարդկանց մեջ: Նույն տոկոսային հարաբերակցությունն է առկա, երբ հարցը վերաբերում է ՀՀ տեղափոխվելու համար ընտանիքի անդամների կամ հարազատների՝ արդեն Հայաստանում գտնվելու փաստին: Հակառակ պատկերն են ցուցադրում արական սեռի ներկայացուցիչները, քանզի ռացիոնալ տարր է նկատվում նրանց պատասխաններում. տղամարդիկ են, որ Հայաստան տեղափոխվելու համար կարևորել են սոցիալական ցանցի և գործնական/առևտրային կապի առկայությունը Հայաստանում (համապատասխանաբար 4 և 3 անգամ ավելի իզական սեռի ներկայացուցիչներից):

Էթնոսոցիոլոգիական հետազոտության տվյալների վերլուծության համաձայն՝ սիրիահայ բնակիչների կազմը Հայաստանում ըստ սեռատարիքային չափանիշի հետևյալն է (աղյուսակ 1)։

Աղյուսակ 1. Սիրիահայ բնակչությունը ՀՀ-ում՝ ըստ սեռատարիքային խմբերի. %

Տարիք Սեռ	0-7	8-12	13-17	18-35	36-55	56<	Ընդամենը
Արական	6.8	2.5	3.0	12.5	13.4	7.4	45.6
Բզական	6.0	4.6	3.3	16.1	14.0	10.4	54.4
Ընդամենը	12.8	7.1	6.3	28.6	27.4	17.8	100

Աղյուսակ 1-ի տվյալներից նկատելի է, որ անչափահաս բնակչությունը կազմում է ընդհանուրի մոտ 1/4 մասը՝ 26.2%, որի մոտավորապես կեսը (12.8%) 0-7 տարեկան մանուկներն են։ Հայաստանում ծնելիության աճի ցուցանիշի վրա փոքր, սակայն դրական ազդեցություն են ունեցել նաև սիրիահայերը, քանի որ այդ խմբի մեջ 1.4%-ը այն մանուկներն են, որոնք ծնվել են Երևանում։ Մեկ ուրիշ համադրությամբ առավել ուրախալի ցուցանիշ է ստացվում, քանի որ նրանք 1/3 մասն են կազմում Սիրիայից եկած այն հայերի, որոնց ծննդավայրը Երևանն է։

Այստեղ հատկանշական է երիտասարդ սերնդի ներկայացուցիչների թիվն ընդհանուր կազմում, քանզի շատ կարևոր է նաև նրանց դերը Հայաստանի ժողովրդագրության առկա մակարդակը գնահատելու տեսանկյունից։ Խոսքը ամուսնությունների թվի աճի և դրանից բխող այլ դրական հետևանքների մասին է, որոնք կարող են գրանցվել, եթե սիրիահայ երիտասարդներն իրենց ապագան կապեն հայրենիքի հետ։ Երիտասարդական ներուժի կարևորությունը հաստատվում է նաև մեկ այլ ցուցանիշով, որը դուրս է բերվել ամուսնական կարգավիճակի վերլուծության շնորհիվ։ Սիրիահայ չափահաս բնակչության մոտ 25%-ն ամուրի է, ընդ որում, ամուրիների 81%-ը հենց այդ տարիքային խմբում է։

Միջին սերնդի ներկայացվածությունը սիրիահայերի ընդհանուր խմբում ևս բավական մեծ է՝ 27.4%, որը մոտ 10%-ով ավելի շատ է ավագ տարիքային խումբը ներկայացնող ցուցանիշից։ Նշենք, որ այս խմբում ևս կան ամուրիներ. 36-45 տարիքային խմբում են չամուսնացածների 12%-ը, իսկ 46-55-ում՝ նախորդից կիսով չափ պակաս¹⁰։ Ամուսնական կարգավիճակի հարցը համադրելով սեռային բնութա-


¹⁰ Ամուրիների 1%-ը ավագ սերնդի ներկայացուցիչներ են։

գրիչի հետ՝ նկատում ենք, որ չամուսնացած տղամարդիկ ավելի են կանանցից՝ 54 (արական) և 46 (իգա-կան) տոկոսային հարաբերակցությամբ:

Սիրիահայ չափահասների 64%-ն ամուսնացած է¹¹, ընդ որում սիրիահայ ավանդական համայնքի շրջանում ամուսնությունը պարտադիր օրհնվում է եկեղեցում, կատարվում է նաև պետական գրանցում:

Ըստ հետազոտության արդյունքների՝ Հայաստանում ապրող սիրիահայ մեկ ընտանիքում անդամների քանակը հետևյալն է.

Գրաֆիկ 1. Սիրիահայ ընտանիքներում անդամների քանակը, 2014 (%)



Ըստ գրաֆիկ 1-ի՝ մեծ տոկոս են կազմում այն ընտանիքները (մոտ 34%), որտեղ անդամների թիվը 4-ն է (ընտանիքում անդամների միջին թիվն էլ մոտավորապես 4-ն է՝ 3.98): Գրեթե հավասարաչափ բաշխվածություն ունեն 2, 3, 5, 6 և ավելի անդամներ ունեցող ընտանիքները, համապատասխանաբար՝ 15.2%, 15.2%, 16.3%, 15.2%: Հետազոտությանը մասնակցել են նաև մենակ ապրողներ, որոնք սիրիահայ ընտանիքների 4.3%-ն են (աղյուսակ 2):

Աղյուսակ 2. Սիրիահայ ընտանիքների կազմը (%)

1. Մենակ ապրողներ	4.3
2. Ամուսնացածներ՝ ամուսիններ առանց երեխաների	10
3. Երկսերունդ ընտանիքներ՝ ծնողներ, երեխաներ	41.3
4. Ծնողներից մեկը, երեխաներ	12
5. Եռասերունդ ընտանիքներ՝ ծնողներ, զավակներ, թոռներ	18.5
6. Քույր/եղբայր և ազգականների հետ համատեղ բնակություն	13.9

Աղյուսակ 2-ի տվյալներից նկատելի է, որ Հայաստանում գտնվող սիրիահայ ընտանիքների մեծ մասը՝ 41.3%-ը, երկսերունդ ընտանիք է, որտեղ ապրում են ծնողներն իրենց երեխաների հետ: Հարցը համադրելով ընտանիքի անդամների քանակի հետ՝ նկատում ենք, որ նման ընտանիքներում առավելագույնը երեք երեխա կա, ընդ որում, նրանց 50%-ը երկու երեխա ունի, իսկ մեկ երեխա ունեցողների թիվը 1.5 անգամ մեծ է երեք երեխա ունեցող ընտանիքների թվից:

¹¹ Սիրիահայ չափահասների մնացած 10%-ը այրիներն են և շատ փոքր զանգված՝ ամուսնալուծված գույգերը (1%):

Սիրիահայ ընտանիքներում հաջորդ մեծ զանգվածը՝ 18.5%-ը, եռասերունդ ընտանիքն է, որտեղ ավագ սերնդի ներկայացուցիչներն ապրում են իրենց զավակների և թոռների հետ: Այստեղ անդամների թիվը տատանվում է 4-7 միջակայքում:

Տվյալներից նկատելի է, որ 12% ընտանիքներում բացակայում է ծնողներից մեկը՝ հայրը, որն աշխատելու նպատակով գտնվում է Հայաստանից դուրս: 10% ընտանիքներում ամուսնական զույգերն ապրում են առանց երեխաների: Հաշվի առնելով ստեղծված կենցաղային պայմանները՝ սիրիահայ ընտանիքների 13.9%-ը Հայաստանում բնակվում է այնպիսի կազմով, որով չի բնակվել Սիրիայում՝ խաղաղ պայմաններում: Այդ ընտանիքներում մեկ հարկի տակ ապրում են քույրեր և եղբայրներ՝ և՛ ամուսնացած, և՛ չամուսնացած կարգավիճակով, և՛ ազգականներ:

Ըստ հետազոտության արդյունքների՝ սիրիահայերի մեծ մասը (63%) արտերկրում չունի ընտանիքի անդամ, իսկ 37% ընտանիքներում բացակայում են 1-5 անդամներ,¹² որոնք տարբեր երկրներում են: Երկրների ցուցակում ամենամեծ մասը (61%), բնականաբար, զբաղեցնում է Սիրիան, քանի որ հայերին այդքան հարազատ դարձած երկիրը դժվար պահին չլքելու ցանկությունը, Հայաստան տեղափոխվելու կասկածները, ի վերջո, սեփականության կորստի վախը ումանց դեռ ստիպում են մնալ պատերազմական վտանգի մեջ: Իսկ ոմանք, տեղափոխելով ընտանիքը Հայաստանում, մեկնել են աշխատանքի արաբական երկրներ՝ Լիբանան(8%), Դուբայ(8%), Քուվեյթ(5%), Սաուդյան Արաբիա, նաև ոչ արաբական երկրներ՝ Վրաստան, Գերմանիա, ԱՄՆ և այլն:

Աղյուսակ 3-ում ներկայացված է սիրիահայերի կարգավիճակի համեմատական նկարագիրը Հայաստանում 2014 թվականին և Սիրիայում՝ մինչև պատերազմը:

Աղյուսակ 3. Սիրիահայերի կարգավիճակի համեմատական պատկերը Սիրիայում (մինչև 2012 թ.) և ՀՀ-ում (2014 թ.) (%)

Սոցիալական ստատուս	Սիրիա	ՀՀ
1. Ուսանող/ուսանողուհի	4	3
2. Տնային տնտեսուհի	27	20
3. Թոշակառու/տարիքային, հաշմանդամության/	2.5	12
4. Գործազուրկ	0	39
5. Ինքնազբաղված	36	13
6. Տարբեր ոլորտներում աշխատող	30.5	13
Ընդամենը	100	100

¹² 19% ընտանիքներում մեկ անդամը ՀՀ-ում չէ, 14%-ում՝ 2-ը, իսկ 4% ընտանիքներում բացակայում է երեքից ավելի անդամ:

Աղյուսակի տվյալներից ակնհայտ է հատկապես գործազուրկի կարգավիճակի կտրուկ փոփոխությունը: Փաստորեն, Միրիայում հայերը, եթե ունեցել են ցանկություն, և ընտանեկան կամ ֆիզիկական հանգամանքները չեն խանգարել նրանց աշխատելուն, ապա ունեցել են աշխատանք, իսկ ՀՀ-ի գործազրկության ներկա մակարդակը մեծ ազդեցություն է ունեցել նրանց սոցիալական կարգավիճակի վրա. սիրիահայերի 39%-ը չի կարողանում աշխատանք գտնել Հայաստանում: Տնային տնտեսուհու կարգավիճակը ևս հետաքրքիր փոփոխություն է կրել, քանզի Միրիայում երբեմնի տնային տնտեսուհիներն այժմ Հայաստանում աշխատանք են փնտրում, ումանք նաև աշխատում են: Փոխվել է նաև ինքնազբաղվածների և տարբեր ոլորտներում աշխատողների հարաբերակցությունը. Միրիայում հայերն ավելի մեծ ծավալներով են իրականացրել սեփական ձեռնարկատիրական գործունեություն, քան Հայաստանում:

Չանտեսելով ՀՀ-ի սոցիալ-տնտեսական վիճակը՝ սիրիահայերի գործազրկության նման մակարդակը ինչ-որ չափով (ասում ենք՝ ինչ-որ չափով նաև այն պատճառով, որ աշխատող սիրիահայերի կեսը՝ 50%-ը, Հայաստանում չի աշխատում իր մասնագիտությամբ) կարելի է բացատրել նաև չափահաս սիրիահայերի մասնագիտական նկարագիրը վերլուծելու միջոցով: Աղյուսակ 4-ի տվյալներից երևում է, որ Հայաստանում գտնվող չափահաս սիրիահայերի 31%-ը չունի մասնագիտություն: Իսկ ընդհանուր ցուցակը վկայում է այն մասին, որ նրանց մասնագիտական նկարագիրը բավական բազմազան է՝ ընդգրկելով և՛ հասարակական կյանքի տարբեր ոլորտների մասնագետների (առողջապահություն, կրթություն/գիտություն, մշակույթ և այլն), և՛ սպասարկման ոլորտի մասնագետների՝ (ավտովերանորոգողներ, ձևավորողներ, վարսահարդարներն այլն), և՛ արհեստավորների (երկաթագործներ, ոսկերիչներ, դերձակներ և այլն):


Աղյուսակ 4. Միրիահայերի մասնագիտական նկարագիրը (%)

0. Մասնագիտություն չունեն	31
1. Ավտովերանորոգման մասնագետներ	10
2. Տնտեսագետներ/մաթեմատիկոսներ	9.5
3. Առողջապահության ոլորտի մասնագետներ	9
4. Երկաթագործներ/ատաղձագործներ	4.8
5. Ոսկերիչներ	4.4
6. Օտար լեզուների մասնագետներ	3.3
7. Ձևավորողներ	3.3
8. Դիմահարդարներ/վարսահարդարներ	2.6
9. Մանկավարժներ	2.2
10. Դերձակներ	2.2

11. Խոհարարներ	2
12. Երաժիշտներ/երգիչներ	2
13. Տեղեկատվական տեխնոլոգիաների մասնագետներ	1.5
14. Այլ ¹³	12.2
Ընդամենը	100

Սիրիահայերի կրթական մակարդակով ևս որոշ չափով կարելի է բացատրել գործազրկության նման ցուցանիշը: Գրաֆիկ 2-ից տեսնում ենք, որ Հայաստանում գտնվող սիրիահայ չափահաս բնակիչների 40%-ը չունի միջնակարգ կրթություն, 24,5%-ը միջնակարգ կրթությամբ են, և միայն 22,5%-ն ունի բարձրագույն կրթություն¹⁴ (բարձրագույն և թերի բարձրագույն կրթություն ունեցողների մեջ իգական սեռի ներկայացուցիչներն ավելի են արական սեռի ներկայացուցիչներից): Հարցը դիտարկելով հայկական աշխատաշուկայում առաջարկ-պահանջարկի տեսանկյունից, կարելի է ենթադրել, որ սիրիահայերի առաջարկը համապատասխան չէ տեղի աշխատաշուկայի պահանջարկին, քանի որ ՀՀ-ի այսօրվա աշխատաշուկան, ելնելով երկրի տնտեսության ներկայիս վիճակից, մեծավ մասամբ պահանջում է բարձրագույն որակավորմամբ կադրեր:

Գրաֆիկ 2. Սիրիահայերի կրթական մակարդակը, %



Ինչպես նշեցինք, սիրիահայերի ներուժը մեր երկրում օգտագործելու համար և ընդհանրապես հայրենադարձության մասին խոսելիս հարկավոր է մեկ բանի վրա ուշադրություն դարձնել՝ սիրիահայր ինչքանով է պատրաստ մնալ Հայաստանում: Ըստ հետազոտության արդյունքների՝ հարցմանը մասնակցած սիրիահայերի մեծ մասը՝ 52.2%, հնարավորության դեպքում ընդմիշտ կմեկնի Հայաստանից¹⁵: Իսկ

¹³Դրանց թվում են նաև հետևյալ մասնագիտությամբ սիրիահայեր՝ իրավաբան ու ֆիզիկոս, գյուղատնտես և էլեկտրիկ, նկարիչ/լուսանկարիչ ու լրագրող, կոշիկակար ու վարորդ, կենցաղային ապրանքներ վերանորոգող, զբոսաշրջության ոլորտի մասնագետներ:

¹⁴Սիրիահայերի 5%-ն ունի միջնակարգ մասնագիտական կրթություն, 8%-ը՝ թերի բարձրագույն:

¹⁵ Այս զանգվածի մեջ մեծ մասը՝ 46%, միջին սերնդի ներկայացուցիչներն են՝ 36-55 տարիքային խումբ, 29%-ը՝ երիտասարդներն են, իսկ ավագ սերունդը մեկնել ցանկացողների 25%-ն է կազմում:

երկրների ընտրությունը, առաջին հերթին, կանգ է առնում Միջին Արևելքի վրա. մեկնել ցանկացողների մոտ 42%-ը մտադրություն ունի վերադառնալ Միջին Արևելք, եթե պատերազմական վտանգն անցնի, և քիչ թե շատ պայմաններ ստեղծվեն բնականոն կյանքը շարունակելու համար: Հաջորդ մեծ զանգվածը թեպետ ցանկանում է հեռանալ Հայաստանից, սակայն դժվարանում է պատասխանել, թե որ երկիր (16.7%): Այլ երկրների ցանկում, ըստ սիրիահայերի մեկնելու մտադրության, հայտնվել են ԱՄՆ-ը, Շվեդիան, Կանադան, Գերմանիան, Ֆրանսիան, Ավստրալիան, նաև Լիբանանը:

Միջին Արևելքի տեղի ունեցող իրադարձությունների հետևանքով կարծես տեղի է ունենում ներափյունության միգրացիոն շարժում, և հայերը մի համայնքից գնում են մյուս համայնք՝ Հայաստանի համայնքում ժամանակավոր ապաստան: Մինչդեռ Հայաստանում գտնվող սիրիահայ համայնքը՝ իր մարդկային ներուժով, դրական լուրջ ազդեցություն կարող է ունենալ երկրի ժողովրդագրական ներկա մակարդակի վրա: Ժամանակն է, որ Հայաստանը որոշի իր գերակայությունները և ապագայի մասին հստակ պատկերացում ձևավորի. ուզում է բավարար պայմաններ ստեղծել սիրիահայերին հայրենիքում պահելու, հզոր երկիր լինելու համար:

СОЦИАЛЬНО-ДЕМОГРАФИЧЕСКИЙ ПОТЕНЦИАЛ СИРИЙСКИХ АРМЯН В РА

АКОПЯН Г. Л.

Резюме

В результате военных действий в Сирии представители сирийской армянской общины мигрируют в Армению, при этом большая часть мигрантов намерена покинуть Республику. Между тем формирование сирийской общины в Армении может положительно сказаться на демографическом уровне республики, о чем свидетельствуют результаты проведенных нами этносоциологических исследований.

THE SOCIAL-DEMOGRAPHIC POTENTIAL OF SYRIAN ARMENIANS IN THE RA

G. HAKOBYAN

Abstract

As a result of the military actions in Syria, the representatives of Syrian-Armenian community migrate to Armenia, besides a great part of migrants intend to leave Armenia. Meanwhile, the formation of Syrian community in Armenia may have a positive impact on the demographic level of the republic. The evidence of which are the results of the ethno-sociological survey made by us.